

AKASHVANI (AIR)
RNU : KOLKATA
Bengali Text Bulletin

Date 04-01-2025

Time: 7.35 A.M.

বিশেষ বিশেষ খবর –

১) নদীয়ার শান্তিপুরের ফুলিয়ায় আজ ইন্ডিয়ান ইনস্টিটিউট অফ হ্যান্ডলুম টেকনোলজির নিজস্ব ক্যাম্পাসের উদ্বোধন করবেন কেন্দ্রীয় বস্ত্র মন্ত্রী গিরিরাজ সিং ।

কেন্দ্রের বিভিন্ন উদ্যোগ রাজনীতির উর্দে উঠে সাধারণ মানুষের কাছে পৌঁছ দিতে তিনি মুখ্যমন্ত্রীর প্রতি আবেদন জানান ।

২) রাজ্যের দক্ষিণবঙ্গের জেলা ভূগলী থেকে ক্ষুদ্র ও মাঝারি শিল্পে ২ হাজার ২৬০ কোটি টাকা বিনিয়োগের প্রস্তাব এসেছে ।

৩) মালদায় তৃণমূল কংগ্রেস নেতা দুলাল সরকার খুনের ঘটনায় ধৃত চারজনকে ১৪ দিনের পুলিশী হেফাজতে পাঠানো হয়েছে ।

৪) জনবসতি এলাকায় হাতির হানা আটকাতে রাজ্য সরকার তাদের চলাচলের পথ পরিখা দিয়ে ঘিরে দেওয়ার সিদ্ধান্ত নিয়েছে ।

৫) কাঁচামালের অস্বাভাবিক মূল্যবৃদ্ধির প্রেক্ষিতে আগামীকাল থেকে পাউরুটির দাম বাড়ছে ।

৬) কলকাতার পার্ক সার্কাস ময়দানে শুরু হয়েছে মিলন উৎসব ।

(বাইট – গিরিরাজ)

এর আগে গিরিরাজ সিং উত্তর ২৪ পরগনার সোদপুরে এক বেসরকারি সংস্থায় কেন্দ্রের অধিনস্ত সংস্থা নিনফেটর প্রযুক্তি দিয়ে তৈরি প্রাকৃতিক তন্তু উৎপাদনের তিনটি যন্ত্রের উদ্বোধন করেন। ঐ সংস্থাটি ঘুরে দেখার পাশাপাশি তিনি একাধিক জুটমিল মালিকের সঙ্গে কথা বলেন।

০০০০০০০০০০০০০০০০০০০০০০০০০০০০

রাজ্যের দক্ষিণবঙ্গের জেলা হুগলি থেকে ক্ষুদ্র, মাঝারি ও ছোট শিল্পে দুই হাজার ২৬০ কোটি টাকা বিনিয়োগের প্রস্তাব এসেছে। চুঁচুড়া রবীন্দ্রভবনে আয়োজিত সিনারজি কনক্লেভে উপস্থিত জেলার প্রায় পাঁচশো জন শিল্পদ্যোগী গতকাল এই বিনিয়োগের প্রস্তাব দিয়েছেন বলে সরকারিভাবে জানানো হয়েছে। এই জেলায় শিল্পের উন্নয়নে গত এপ্রিল থেকে সেপ্টেম্বর পর্যন্ত বিভিন্ন শিল্প উদ্যোগীকে তিন হাজার ২৮৪ কোটি টাকা ব্যাংক ঋণ দেওয়া হয়েছে। এছাড়াও বাংলাশ্রী প্রকল্পে ১৪টি ইউনিটকে ১ কোটি ৮৮ লক্ষ টাকা ভর্তুকি দেওয়া হয়েছে বলে নবান্ন থেকে জারি করা এক সরকারি বিবৃতিতে জানানো হয়েছে। গত মাস পর্যন্ত এই জেলায় থাকা প্রায় ৮০ হাজার ক্ষুদ্র, ছোট ও মাঝারি শিল্পে কর্মসংস্থান হয়েছে ৪ লক্ষ ৬০ হাজার মানুষের।

০০০০০০০০০০০০০০০০০০০০০০০০০০০০

মালদায় তৃণমূল কংগ্রেস নেতা দুলাল সরকার খুনের ঘটনায় ধৃত চারজনকে ১৪ দিনের পুলিশী হেফাজতে পাঠানো হয়েছে। তাদের গতকাল আদালতে তোলা হলে বিচারক এই নির্দেশ দেন। এরা ইংরেজবাজার ও বিহারের কাটিহারের বাসিন্দা বলে পুলিশ সূত্রে জানা গেছে। ধৃতদের কাছ থেকে উদ্ধার হয়েছে আগ্নেয়াস্ত্রও।

এদিকে, ইংরেজবাজারের সাদুল্লাপুর মহাশ্মশানে গতকাল দুলাল সরকার ওরফে বাবলার শেষকৃত্য সম্পন্ন হয়।

এর আগে তৃণমূলের জেলা কার্যালয়ে তার মরদেহে শেষ শ্রদ্ধা জানান মন্ত্রী ফিরহাদ হাকিম, শিলিগুড়ির মেয়র গৌতম দেব, ইংরেজবাজার পৌরসভার চেয়ারম্যান

কৃষ্ণেন্দুনারায়ণ চৌধুরী, মন্ত্রী সাবিনা ইয়াসমিন, সাংসদ মৌসম বেনজির নূর সহ অন্যান্য দলেরও বিভিন্ন নেতৃত্বরা ।

০০০০০০০০০০০০০০০০০০০০০০

মুর্শিদাবাদ পৌরসভার ৮ নং ওয়ার্ডের নাকুড়তলায় বোমা বাঁধতে গিয়ে ভয়াবহ বিস্ফোরণের ঘটনায় আহত ফরিদ শেখ তৃণমূল কংগ্রেস কর্মী বলে বিজেপি অভিযোগ করেছে। মুর্শিদাবাদের বিজেপি বিধায়ক গৌরিশঙ্কর ঘোষ, পৌরোপিতা ইন্দ্রজিত ধর সহ তৃণমূল নেতৃত্বের সঙ্গে তাঁর ভিডিও তুলে ধরে এই অভিযোগ করেন। তার দাবি ওই বিধানসভা এবং ওয়ার্ডে বিজেপি-র সাংগঠনিক শক্তি বেশী থাকায় দলের নেতা-কর্মীদের টার্গেট করা হচ্ছে। তাই সেখানে বোমা মজুত করা হচ্ছিল।

বিধায়কের নেতৃত্বে লালবাগে গতকাল পথ অবরোধ করে বিক্ষোভ দেখান বিজেপি নেতা কর্মীরা।

বিরোধী দলনেতা শুভেন্দু অধিকারিও এই ঘটনায় ক্ষোভ প্রকাশ করে টুইট করেছেন।

উল্লেখ্য, গতকাল ফরিদ শেখের বাড়িতে তীব্র বিস্ফোরণে টালির চাল উড়ে যায়। গুরুতর জখম ফরিদ মুর্শিদাবাদ মেডিকেল কলেজে চিকিৎসাধীন।

০০০০০০০০০০০০০০০০০০০০০০

দক্ষিণ চব্বিশ পরগনার বকুলতলা থানার হানারবাটি গ্রামে জমি সংক্রান্ত বিবাদকে কেন্দ্র করে বোমা বাজির অভিযোগ উঠেছে। বাড়ির একানশ এবং খড়ের গাদায় আগুন ধরিয়ে দেওয়া হয়। ঘটনাস্থল থেকে উদ্ধার হয়েছে তাজা বোমা।

নূর মোহাম্মদ শেখের সঙ্গে প্রতিবেশী বাসার শেখের জমি বিবাদ দীর্ঘ দিনের। গতকাল হঠাৎ করেই ৪০ / ৫০ জন হামলা চালায় বলে অভিযোগ। বাড়ি ভাঙচুর, বোমাবাজি, বাড়িতে লুটের অভিযোগ খতিয়ে দেখতে বকুলতলা থানার পুলিশ ঘটনাস্থলে যায়।

০০০০০০০০০০০০০০০০০০০০০০

ডাকাতির অভিযোগে দুবরাজপুর থানার পুলিশ মাজুরিয়া জঙ্গলের রাস্তা থেকে ২ জনকে গ্রেফতার করেছে। ধৃতদের মধ্যে নিশিকান্ত গোপ, ঝাড়খন্ডের বাগডহরি থানার মুরা বেড়িয়া গ্রামের বাসিন্দা, অপর ধৃত গৌতম মন্ডলের বাড়ি দুবরাজপুরের খয়েরবন গ্রামে। এদের কাছ থেকে উদ্ধার হয়েছে ৩-টি মোবাইল ফোন। ধৃতদের গতকাল দুবরাজপুর আদালতে তোলা হলে ১৫-ই জানুয়ারী পর্যন্ত জেল হেফাজতে পাঠানো হয়। পুলিশ জানিয়েছে, সম্প্রতি দুবরাজপুরের পন্ডিতপুর পেট্রল পাম্পের কাছ থেকে ডাকাতির অভিযোগে তিনজনকে গ্রেফতার করা হয়। তাদের জিজ্ঞাসাবাদ করেই এই দু-জনের হদিশ মেলে।

০০০০০০০০০০০০০০০০০০০০০

পশ্চিম বর্ধমানের জামুড়িয়ার কুনুস্তুরিয়া এলাকায় সিয়ারশোল খোলামুখ খনির পাশে একটি অবৈধ পরিতক্ত খনির গহ্বরে পড়ে ভীষ্ম রায় নামে এক ব্যক্তির মৃত্যু হয়েছে। রানিগঞ্জের মহাবীর কোলিয়ারির বাসিন্দা ভীষ্ম গতকাল খনি গহ্বরে পড়ে যান। রানিগঞ্জ ও জামুড়িয়া থানার পুলিশ ঘটনাস্থলে গিয়ে তার সন্ধ্যানে তল্লাশি শুরু করে। কাজে লাগানো হয় উদ্ধারকারী দলকেও। পরিতক্ত খাদটিতে বিষাক্ত গ্যাসের আশঙ্কার প্রেক্ষিতে উদ্ধার কাজ কিছুটা ব্যাহত হয়। অনেক তল্লাশির পর সন্ধ্যায় উদ্ধার হয় তাঁর দেহ।

এদিকে, ইসিএল-এর পাণ্ডবেশ্বর খোঁটাডিহি কোলিয়ারীর দু-নম্বর পিটে গতকাল কনভেয়ার ব্লেটে পড়ে গিয়ে এক শ্রমিকের মৃত্যু হয়েছে। মৃত মহিমারঞ্জন রজক জামুড়িয়ার শিবপুরের বাসিন্দা। স্বপরিবারে তিনি কোলিয়ারির আবাসনে থাকতেন। কাজ করার সময় অসাবধানতাবশত কনভেয়ার ব্লেটে পড়ে জড়িয়ে গেলে এই দুর্ঘটনা ঘটে।

এদিকে, দুর্ঘটনার খবরে অন্য শ্রমিকরা কোলিয়ারী চত্বরে দেহ রেখে ক্ষতিপূরণের দাবি জানাতে থাকেন। পরে এলাকার বিধায়ক নরেন্দ্রনাথ চক্রবর্তীও ঘটনাস্থলে যান। পরে মৃতের পরিবারের একজনকে চাকরির আশ্বাসে অবরোধ তুলে নেওয়া হয়।

০০০০০০০০০০০০০০০০০০০০০

জনবসতি এলাকায় হাতির হানা আটকাতে রাজ্য সরকার তাদের চলাচলের পথ বা করিডোরের পাশের গ্রামগুলিকে পরিখা দিয়ে ঘিরে দেওয়ার পরিকল্পনা নিয়েছে। পরিকল্পনা বাস্তবায়িত হলে জঙ্গল লাগোয়া গ্রামের বাসিন্দারা যেমন হাতির উপদ্রব থেকে অনেকখানি রেহাই পাবেন একইভাবে চাষের ক্ষেত্রে ওই খালের জলও ব্যবহার করা যাবে। প্রসঙ্গত মুখ্যমন্ত্রী মমতা ব্যানার্জি প্রশাসনিক বৈঠকে জঙ্গলমহলে হাতির উপদ্রব নিয়ে উদ্বেগ প্রকাশ করেন। সেই সঙ্গে হাতির হানায় জীবন ও সম্পত্তি হানা রুখতে এই পরিকল্পনা সম্পর্কে বন দফতরকে পরামর্শ দেন। তার পরেই তারা এব্যাপারে উদ্যোগী হয়েছে।

০০০০০০০০০০০০০০০০০০০০

ভারত- বাংলাদেশ টানাপোড়েনের মধ্যেই আগামীকাল বঙ্গোপসাগরে ভারত ও বাংলাদেশে আটক মৎস্যজীবীদের বিনিময় হবে। বাংলাদেশ থেকে ভারতে ফিরবেন ৯৫ জন মৎস্যজীবী। অন্যদিকে ভারত থেকে বাংলাদেশে ফিরবেন ৯০ জন মৎস্যজীবী। আজ সকালে কাকদ্বীপ থেকে ১২ জন বাংলাদেশী মৎস্যজীবীকে হলদিয়া নিয়ে যাওয়া হচ্ছে।

অন্যদিকে পারাদ্বীপ থেকে ৭৮ জন বাংলাদেশী মৎস্যজীবী বঙ্গোপসাগরে নিয়ে যাওয়া হবে। সবমিলিয়ে ৯০ জন বাংলাদেশী মৎস্যজীবী দেশে ফিরবেন। বাংলাদেশ জেল থেকে ইতিমধ্যে মুক্তি পেয়েছে ৯৫ জন ভারতীয় মৎস্যজীবী। এই ভারতীয় মৎস্যজীবীদের অধিকাংশের বাড়ি কাকদ্বীপ, নামখানায়। গত অক্টোবর ও নভেম্বর মাসে বাংলাদেশ জল সীমানায় ঢুকে পড়ার অভিযোগে গ্রেফতার হয়। আটক করা হয় ৬ টি ট্রলার। ভারতীয় মৎস্যজীবীরা নিজেদের ট্রলার নিয়েই ফিরবেন।

প্রশাসন সূত্রে জানা গেছে, ৬ তারিখ গঙ্গাসাগরে তোলা হবে ভারতীয় মৎস্যজীবীদের। সেইসময় মুখ্যমন্ত্রী মমতা ব্যানার্জি গঙ্গাসাগরে থাকবেন। স্বস্তিতে ভারতীয় মৎস্যজীবীদের পরিবার।

০০০০০০০০০০০০০০০০০০০০

২০২৬ এর নির্বাচনের দিকে তাকিয়ে কেন্দ্রের বিজেপি ও রাজ্যের তৃণমূল কংগ্রেস সরকার উভয়েই সীমান্ত দেখাচ্ছে বলে সিপিআইএম দাবি করেছে। দলীয় মুখপাত্র 'গণ শক্তি' র ৫৯-তম প্রতিষ্ঠা দিবস উপলক্ষ্যে আয়োজিত এক অনুষ্ঠানে গতকাল সিপিআইএম এর রাজ্য সম্পাদক মহম্মদ সেলিম এই দাবি করে বলেন, মৌলবাদী শক্তি বাংলাদেশকে অশান্ত করছে। আর তা দেখিয়ে এদেশে সাম্প্রদায়িক সম্প্রীতি নষ্টের চেষ্টা হচ্ছে। এখানে মুসলিম বিদ্বেষ ছড়ানোর পাশাপাশি ওই দেশে চলছে ভারত বিদ্বেষ। নিত্য প্রয়োজনীয় জিনিসের মূল্য বৃদ্ধি কেনো হচ্ছে পাশাপাশি শ্রমিকের আয় কমেছে, মানুষ কেনো বিচার পাচ্ছে না এই নিয়ে রাজ্যের মুখ্যমন্ত্রী কোনো কথা বলছেন না।

০০০০০০০০০০০০০০০০০০০০০

কলকাতার পার্ক সার্কাস ময়দানে শুরু হয়েছে মিলন উৎসব ২০২৫। গতকাল এর আনুষ্ঠানিক উদ্বোধন করেন রাজ্যের পুর ও নগর উন্নয়ন মন্ত্রী, কলকাতা পুরসভার মেয়র ফিরহাদ হাকিম। তিনি বলেন, সারা বাংলা মিলন উৎসবের প্রাঙ্গণ। সব ধর্মের মেলবন্ধনে বাংলার সংস্কৃতি। আর এই সংস্কৃতি ই মিলন উৎসব। এটাই বাংলার সংস্কৃতি বলে মন্তব্য করেন ফিরহাদ হাকিম।

ওপারে সংখ্যালঘুদের ওপর অত্যাচার, অন্যায় বলে তিনি মন্তব্য করে বলেন, যেহেতু বিষয়টি বিদেশ নীতি র অন্তর্গত সেজন্য এ নিয়ে কেন্দ্রীয় সরকারের নীতি মানতে হবে। সব সম্প্রদায়ের মানুষকে এই মিলনমেলায় অংশ নেয়ার আবেদন জানান মন্ত্রী ফিরহাদ হাকিম।

উদ্বোধনী অনুষ্ঠানে মন্ত্রী জাভেদ আহমেদ খান, বাবুল সুপ্রিয়, সিদ্দিকুল্লা চৌধুরী, কলকাতা পুর সভার মেয়র পরিষদ সদস্য আমির উদ্দিন ববি সহ সরকারি আধিকারিকেরা ও বিশিষ্ট জনেরা উপস্থিত ছিলেন।

পশ্চিমবঙ্গ সরকারের সংখ্যালঘু উন্নয়ন ও বিত্ত নিগম আয়োজিত এই মিলন উৎসব চলবে ৭ ই জানুয়ারি পর্যন্ত। মিলন উৎসবের এই মেলায় কেরিয়ার কাউন্সেলিং, স্বাস্থ্য

শিবির ,বিজ্ঞান প্রদর্শনী ও সাংস্কৃতিক অনুষ্ঠানের আয়োজন করা হয়েছে। থাকছে হস্তশিল্প প্রদর্শনী ।

০০০০০০০০০০০০০০০০০০০০

কাঁচামালের অস্বাভাবিক মূল্য বৃদ্ধির জেরে পাউরুটির দাম বাড়তে চলেছে। আগামীকাল (রবিবার) থেকে ৪০০ গ্রাম রুটির দাম ৩২ টাকা থেকে বেড়ে হবে ৩৬ টাকা। ২০০ গ্রাম রুটির দাম ১৮ টাকা এবং ১০০ গ্রামের দাম ৯ টাকা ৫০ পয়সা হবে। বেকারি সংগঠন জয়েন্ট অ্যাকশান কমিটির তরফে গতকাল এ কথা জানানো হয় ।

০০০০০০০০০০০০০০০০০০০০

অভিনেত্রী শোভা সেনের জন্ম শতবার্ষিকী উদযাপনের অন্তিম পর্বে এ মাসের ৮ তারিখ থেকে ২৬ শে ফেব্রুয়ারি পর্যন্ত একগুচ্ছ কর্মসূচি নেওয়া হয়েছে কলকাতায়। থাকছে তাঁর অভিনীত নাটকের পুনঃনির্মাণ ও কলকাতা দূরদর্শনের সৌজন্যে ভিডিও প্রদর্শনী। দেখানো হবে শোভা সেন অভিনীত চলচ্চিত্র ও - (ভগিনী নিবেদিতা, মা ও পদ্মা নদীর মাঝি।)

একটি প্রতিবেদন-

(ভয়েসকাস্ট - অভিজিৎ)

০০০০০০০০০০০০০০০০০০০০